

四庫全書

集部

欽定四庫全書

涉齋集卷十一

宋 許綸 撰

七言律詩

寄陳頤剛

眼見交遊半陸沈可無百丈引清深
注成兵法有奇志閒過壯年應苦心
幾度梅花開悵望有時楊葉夢追尋
男兒機會何終極莫遣愁將鬢髮侵

簡轉庵

扣門有礙吾何適排戶頗疎君作難
不對桃花傾社酒誰憐燕子怯春寒
便過熟食過元已尚看醑醕看牡丹
却笑今年詩厄閨畧無好語入毫端

簡才叔

坐看母竹長龍材衣上新痕染碧苔
杜宇不隨春老去黃鸝偏傍水光來
搖搖書帶連香草冉冉凌霄上古梅
此意轉庵同領解更須潘令好懷開

寄洪州新建知縣

遠聽絃歌樂部封
放衙乘醉半疎慵
家辭南越無千里
縣管西山有幾峯
人望廢田禾影合
吏愁空獄蘚痕重
孺亭應更悲前事
煙草萋萋叫夜蛩

入南鄉檢旱紀所見

分宜南北兩鄉分
路入南鄉過所聞
蕎麥滿山明積雪
晚禾匝野漲黃雲
寸田必墾憐農父
五斗空餐媿令君
惜許早田成旱損
不成樂歲答民勤

紀所見

百年厦屋盡良材客位經年長紫苔
失馬塞翁翻有得撫松陶令盍歸來
門前婀娜千行柳牆角輪囷一樹梅
滿壁圖書非說事錦囊成篋未曾開

夜渡分宜水南

一水彎環抱縣流水南物色總清幽
案頭故紙看成葉眼底青山見即愁
夜喚扁舟乘月渡靜聽魚網瀝波收
忽思孤嶼中川畔滿意秋風落釣鉤

括蒼道中次陳頤剛韻

詩翁四十九行年說著行邊喜欲癲
介婦灘頭隨水宿
馮公嶺上伴雲眠
趨時萍實甜于蜜
閱世匏壺老更堅
冀北須君空一洗
眼前駑馬太勞鞭

宿建德驛追次張于湖壁間韻

此驛閱人多似我
于湖去後有誰來
詩留版壁經年在
門對巖扃盡日開
天上有文修白玉
人間無句對蒼苔
相逢莫問滔滔事
荷蕢曾過有意哉

舟行早起處州溪上

溪容霧氣撲清芬野色微薰曉色分
檣表已迎山背日
纜端猶繫石根雲打頭風信看來轉
當面灘聲語不聞
遙喚漁舟勸回首人鷗那得更同羣

早起

歸來百事盡摧藏卦氣行年分所當
未曉不眠真是老
纔明便起有何忙移山種石愚翁癖
遇酒逢歌楚客狂
此外胸中無箇事有時信口作篇章

睡起

飯了晴窗睡足時杖藜徐步出荆扉若無俗事關人意
只有楊花點客衣黃鳥怨春渾不住杜鵑知我亦思歸
隣家酒熟容賒買竹笋初生韭菜肥

書債山積久逋余丞相報緘連發二書畢喜作

口號

自思堪笑亦堪憐嬾與頑兼不可鐫兩紙書成大功業
三杯酒罷小神仙每當靜處常追悔何似閒時旋補填
害性苦心從古病不如歸去樂殘年

湯晉卿善談命求詩紀實

已近無聞半百年枉煩明鏡照華顛
湓河驛馬妨乘輦
氏宿蒼龍分委天告我三陽聞好語
驗君三命有真傳
預愁一字終無補何日歸歟阿對泉

德久和韻以予請外之力預為悵然再用前韻
已是子思去復來自慙無補効涓埃
麤官只合供煩使
昭代惟須急異才名士不應詩作崇
諸公方擬管吹灰
且容一舸江湖去廬阜煙蘿鎖碧崑

廟堂許以
江西漕節

才叔調倅歸

報謁不值訪松廬
留別拙語併呈

五月征行思竹院半年賡倡負松廬
水西風月分歸後
街北交朋過訪餘攜具洗泥曾醉否
逃禪得句定真如
涉齋終日攢眉坐正賴清新為起予

鮑融州病足叩謁適遇孝若示融州菊詩和篇
次韻呈

不見融州夏涉秋居然款對豁羈愁
猶存尊足憐同病
不繫虛舟任打頭久待一州當斂惠
終煩諸野要營求

我今不啻便應足獨恨於君百未疇

病赤目從薛山甫借荷葉巾

赤目朝來勢轉加病身觀妄有生涯火平文武寬心地
酒遠聖賢疏肺家虛白己能生暗室空青不用點昏花
小冠預擬更名字借與團圓藕葉紗

次韻仲歸病中垂問

痼疾多年久一翁醫方驗後自難功已慙兀者猶尊足
敢企泠然欲御風覓句未能生處熟論交正要苦辭攻

憑君莫話沙堤事此語終諛不是公

次韻呈支茂先賢良

煙蓑不盡四山青古道長將古意評
辟穀久知踈藥裹纂言今見滿書檠
堯年請祝新拋隱宋範爭抄近薦名
聖世埋光那可得清臺恰奏少微明

喜宣甫至戲呈

陶溪路遠強躋攀猶得詩筒暫往還
有便催租俄敗意無心聽鵲忽承顏
菊花滿徑成三老梅萼穿林見一斑

肯為轉庵聊且住預愁約束裹糧慳

次王宣甫題媚川圖韻

底須屏障寫天吳絕境橫前與畫俱兩塔屹波流不去
千帆破浪遠如無空明水月光爭媚開闔雲山妙莫摹
扁榜首蒙摩詰句小亭從此有詩圖

韓幹四馬詩戲贈世京

吾聞北馬來西極驤首躡雲無定姿俯視雙瞳真皎鏡
遙憐一骨獨權奇何年慘澹經營處此日飛揚奔放時

把玩不須嗟歲晚會看天廐著金羈

謝鮑潮州惠歸正李媪所作外國圖因題卷後

二首

兩年貳郡半專州濠上魚涵惠澤游慨念中原變荆棘
圖成外國別冠裘故宮禾黍悲清汴落日風沙慘白溝
漢節提攜曾記別居然展卷涕橫流

健婦真能勝丈夫丹青人物妙難摹百年畫手承平久
萬折歸心守節孤輒此珍藏為我有從渠遠致更能無

傷心故國流風在不是成周王會圖

題元祐諸公跋竇三川詩卷後

門前流水古猶今不見鍾期但苦心
每憶承平愛人物有誰埋沒向山林
一官黃綬甘肥遯百首清詩共賞音
自笑抱關人錄錄亦將名字託碑陰

次韻仲歸漁父

風靜波恬沒是非雨蓑煙笠當冠衣
移將蘭棹垂綸去釣得金鱗帶月歸
到處茅柴賒可準有時蓴菜滑仍肥

旁人道是忘機叟到底從來不識機

王宣甫以新婦魚能鬪為勝負魚有詩擇其訛
謬次韻戲答

爛斑紅黛鬪芳塘新婦魚兒著底忙豈為長陵矜先後
不知濠上樂徜徉詩來解辨吾伊謬我欲兼將勝負忘
蚌鷸相持堪惜許須知旁有謝三郎

聞砧

秋來風物自淒清葉葉枝枝策策鳴近砧不堪催織語

遠砧更送斷腸聲苦心且作丁當和積恨終憑熨帖平
寒女終身無褐彩綺羅通夕課寒檠

觀郭殿巖打毬于冲天觀旁

峯頂毬場翦似平汾陽號令素精明萬蹄攢逐一星過
兩隊驩呼衆樂鳴靜看穿楊矜妙手醉觀過翼覺身輕
摩抄亭下排衙石擬賦將軍射虎行

聽轉庵彈琴

競春人去客苔侵喜對安仁理玉琴百尺游絲非助我

一聲啼鴂是知音
湘桃作意紅兼白
碧柳隨宜淺更深
昨日胭脂今日雪
可憐牆角兩來禽

次韻仲歸觀弈

綠陰晝靜熟觀棋
橫出寧分正與奇
要處不容留活眼
忙時翻笑斂愁眉
手談大似銜枚戰
坐隱幾同過枕師
著罷了然無勝負
機心却許白鷗知

酬轉庵畏酒之什

絕境黃緣有路攀
隔波樓影塔中間
纔收梅溽經旬雨

已放蓮峰幾朶山勝處得閒真閬苑醉餘忘世即函關
詩高不飲妨何事恐對湖光自忸顏

謝鮑潮州送新酒

濁醪青蘂作重陽纔入開爐月果良佳釀遣銷彭澤恨
好懷肯對馬軍嘗清新有句須留待風味如君不可忘
只俟高軒共杯酌四時巖桂尚能香

還杜叔高詩卷送酒

三衢三杜人能說我亦曾闕仲叔間軟語接來真有味

好詩吟到祇如閒名場偈仄雲垂翅澤國冥濛雨蔽山
不有客樓何地著可無尊酒破天慳

次韻酬顯庵寄茶

顯庵多別又多年小草蠅頭越瞭然覓句不為禪所縛
住山長是佛相憐無從飲酒過蓮社尚肯分茶到玉川
肉食正慙無補報歸心已駛不須鞭

鄭文之許惠烏髭方戲簡

墮甌功名久任緣形骸老醜孰蚩妍了知白髮關吾事

敢學烏髭趁少年人謂黃金容可作君藏鴻寶乃能鉛
一皤正博妻孥笑許惠良方試與傳

王宣甫以予有詩求鄭文之染髭法與其舊作
暗合因錄示次韻酬之

細看綠繞與紅圍此地何曾著白髭顧我全驚緇鬢改
羨君猶有黑絲垂一皤博笑幾同調兩醜相看莫斂眉
正使醉中巾幘墮不妨齊唱赤壺詞

戲贈

不鼓君家鑿下材
渴心古井欲生苔
柳枝未放行雲去
巫峽又還為雨來
似染霜髭欺黑漆
尚禁醋齒試青梅
不妨雨過同心賞
一架酴醾花正開

三賡許令姪硯之什

轉庵蓄硯有奇材
受墨逡巡落海苔
異品已堪相甲乙
餘波足可畀雲來
許分阮姪邀金竹
預想將軍慰渴梅
尤物匪珍才可惜
芝蘭正要滿庭開

次韻王宣甫謝筆

筆塚前頭幾泣魚筆耕無獲匪才疎寄將毛穎煩為傳
恰值虞卿正著書千兔難疇終送似兩家託契更誰如
詞章老去輸豪放瓊玉從君要珮琚

謝益老寄英石

淡交如水足生平晚歲煩師託石兄曾解點頭聽半偈
定能發笑驗三生叢林住遍歸來好長物分將過去輕
聞道肯為隣舍佛錦衣只在雁山行

舊藏英石沈儉夫族人處謝儉夫轉為取還

百好殘年心已灰石君久去絕嫌猜故人諾重金難比
族里言溫壁徑迴曾與話禪聽翠竹亦資醒酒卧青苔
如今相見休相歎各是因人歸去來

濟叔輟案上石菖蒲為惠石與菖蒲俱佳拙語

奉酬

蒼然拳石具林巒上有菖蒲八節灘洛浦氎氎餘玉珮
藍田拂拂長琅玕著身便恐移天姥濯髮還疑借消盤
割愛贈予銘座右瀾斑鬢影照應難

欽定四庫全書

涉齋集卷十二

宋 許綸 撰

七言律詩

賀太廟產芝草

太祖
夾室

太室晶瑩粲玉芝
慈闈恰遇未央時
兩宮喜色騰堯采
萬歲歡聲動漢卮
發祉有來增裔葉
產祥方至在孫枝
從今慶事頻頻有
準擬賡歌剩賦詩

得禁中花喜而有作

階前紅少綠多時，尚有名花巨壓枝。
珠璧直疑天上得，瓊瑤難報世間奇。
懸知丹禁鶯花繞，始覺仙家日月遲。
珍重十洲蓬島客，津津喜色見雙眉。

再次韻宣甫探梅

姑射山頭冰雪姿，自應不負歲寒期。
一枝已共巡簷笑，半樹寧忘欲雪詩。
未許佳人和月摘，且容老子受風吹。
城中詩社新牢落，絕喜陶山慰所思。

次韻王宣甫催梅

搖落驅馳自歲年今年慙愧得身安
小園亦有先春意
短思惟知著句難
看水看山從昔好
愛風愛雪待今寒
故人遠寄催梅作
喚起新愁有萬端

再次王宣甫韻

江南春訊漫年年
月下推敲句未安
好語得來元不易
愛花開後却無難
霜晴屋角偏先暖
雪色枝頭已破寒
為向催梅居士語
杖藜肯復過蘇端

次韻王宣甫催梅

犯寒時訪歲寒姿經閨何緣却後期珍重故人勤問訊
剪裁新意作催詩一陽潛與飛灰動九奏深憑畫角吹
莫遣詩筭成斷絕日來頻為起愁思

初得梅花呈似參議劉二十九丈

江南驛使是知津剪送瓊枝裏綠筠觸發家山春意思
喚回天地雪精神護持惟有壺瓶水暎帶全無几案塵
一夜梅坡清入夢不妨持惱謝巖人

張舍人惠古梅醅以拙言

孤標恥付壽陽粧。薜荔為衣，蘚作裳。映竹蒙茸初破白。
倚松鱗甲亦生香。分無踈影追同輩。肯逐羣英殿後芳。
珍重折枝煩寄與。恍思千樹故山旁。

再用韻奉酬

未信時新有儉粧。縞衣趺坐赤帷裳。已甘槁項終肥遯。
無奈酸風發暗香。心苦故應如貌古。林深正不為人芳。
須知已是丈人行。領畧羣英顧在旁。

同寮約過包山。因問訊玉津牡丹。再次韻呈子

儀侍郎

傳聞有約過包山節遇天祺得暫閒便有啼鶯迎柳外
不妨飛蝶導花間東吳壯觀隨潮長西洛風光指日還
獨恨微臣無補報勲名分寸盍躋攀

謝惠牡丹

未歎春光去有涯詩翁時為送名葩娼條冶葉從過眼
魏紫姚黃始是花洗滌壺餅晨井水護持風雨夜窗紗
十眉已覺成羞澀且向樽前領物華

趙漕從善送吳門牡丹

看花檐上眼長寒慚愧鄰翁送牡丹和露擎來香可染
攏雲爭插玉成團傳聞西洛名千變排釋東風恨萬端
茂苑去天真尺五羨君花信報平安

芍藥

揚州千葉舊生涯詩到坡仙正復葩喜見故家翻瑞藥
送將新句續名花日高髮鬢醺含露時樣梳粧肉暎紗
窈窕留春春不住詩翁留得鬢邊華

再用韻

莫問無涯及有涯
眼前萬綠替千葩
故人訪我茫然喜
小閣留春聖得花
美酒急傾門候鑰
清歌未徹燭籠紗
匆匆似此頻能過
猶勝逢人說夢華

三用韻

綠遍山顛與水涯
苦吟且不到春葩
新篁已接三竿日
紅藥猶開四月花
好句更煩銜兩袖
嫩寒猶覺怯重紗
留連小飲無須醉
明月翩翩扈翠華

花藥相接可觀復用韻

淨盡天香溢夏寒滿奩誰擲
狡仙丹落花不逐林花老
禁藥猶堪木藥團試問丁香
和恨結何如萱草破憂端
翠屏紅粉腰如束我是村中
老謝安

傳芍藥復用韻

階藥留春逗晚寒鬢絲敢傍
臉霞丹肯分騎鶴紅千葉
喜見盤龍綠一團妖格流傳
如有恨狂香橫出亦無端
慇懃為換瓶中水排比窗前
兩行安

和人惠白蓮花

碧蓮花發夢灣磯，鶴骨難教厚祿肥。
夜月擎來雙掌露，曉風拂動六銖衣。
漁歌過後香猶濕，鷺影移時雪欲霏。
風月既為專一壑，茅茨何自有光輝。

池蓮

一灣清碧繞中阿，萬柄香紅映麴波。
不道龜魚長受此，只欣鷗鷺數相過。
機心久與塵俱息，警句元無趣自多。
病起情悰聊徙倚，何人解唱野塘歌。

鑿池添種荷花

紫石防花拾棄材鑿池種藕白餘苔

案白餘苔三字難解疑有誤

遊

條刺喜波光闊飛鷺似知人意來已見圓荷浮小葉正
須細雨熟黃梅莫言舊隱無多景一派清泉手自開

玉簪花

琉璃布地綠愔愔苗長藍田夜照林雪色能香開有璞
玉光未拆盞成簪不登雲髻尤孤潔長浸銅壺更久禁
梅與水仙流品外幽蘭相友是同心

秋萱

說著宜男已可羞移栽老圃且忘憂傳為麝種生來別
喚作鹿蔥元是愁幸脫炎威纔過夏何緣冷落尚宜秋
國香天且難拘管過眼空花一笑休

鴈來紅

非花非葉艷茸茸鴈未來時色自紅多似錦衣明畫繡
好同旌節種秋風雞冠麤俗難爭長金鳳低徊漫作叢
誰道後庭遺恨曲龍蟠王氣正英雄

李若兄菊詩同社久已嗟賞賡和屬蒙寫寄仍
用韻以致予奉祠之喜予兩年從金陵覓菊栽
而一種至今著藥未開豈所謂晚節香者耶次

韻奉酬

滿地金錢買斷秋晚年安得有窮愁小園不負長寒眼
佳客自踈新白頭一種最開陶逕晚兩年曾向蔣山求
肯能過訪同心賞猶勝傳聲互答酬

四體支吾兩鬢秋一生知足百無愁洞霄香火手加額

太玉山園茅蓋頭歸去來兮交未息不知我者謂何求
若人共說無生話一句拋來一句躊

次韻章君濟黃元章二廣文種竹建康學宮

城雲一塢碧雲深亦許分青到泮林移去檢書涓醉日
種來挾策較分陰細看直節難教改設有繁霜不受侵
二妙育才如此竹惜無健筆與長吟

即事併寫和質弟詩呈似

新綠惜惜長茂材嫩流漠漠養深苔一梭金影緡蠻過

半纈花光剥啄來
檻竹鳴邊垂粉籜
池萍缺處落肥梅
閒中偏得園林趣
更覺清和意象開

檢校園課濟叔又送花栽欣然有作

雨餘扶杖入蒼苔
檢校園工有品栽
緩引瓜苗教傍架
旋齊菊杪要平臺
出牆新竹矜施粉
立水高荷勸把杯
莫訝小園饒勝事
故人續續送花栽

蔣肖李潘才叔和檢校園課之什再用韻為謝
隨意篇章落海苔
瓊瑤欲報不知裁
青蒲細草來齋几

白雪陽春走皂臺夢裏勲名槐是國閒中活計芥為杯
吟哦蔣徑潘江句淺白深紅手自栽

肖李才叔和篇末章有青蒲自是公家物之語
再用韻為謝

踏破先生客位苔詩仙鳳沼得重栽連城更枉捐雙壁
二妙真堪共一臺蠅到成時元誤筆蛇因添後失持杯
勸君休話青蒲事妄想根苗莫更栽

次韻毛漳州遣价為壽二首

漳州遠為故人東問訊深憐臭味同喜可寒冬耕灞滄
陰堪小麥熟崆峒賤生已覺年駸暮遠祝應難日再中
願老洞霄香火吏餘齡猶得効呼嵩

充位無功得放歸淵明若在恥吾師舊交動色知毛檄
故里分甘到董帷顧我已淪訶譴域如君合建太平基
競傳報政趨嚴召遠業真堪濟此時

為轉庵壽二首

却喜漳南解秩歸天教慰藉老朋知
蒼南蒼北游從舊

浙右浙東賡唱詩上閣有題皆得和西湖無路可陪時
年顏相去追隨得難老如公壽更頤

歲歲新陽喜仲旬兩家兒輩作生辰下生彌勒遲三日
共約梅花作故人未許同龕供佛事只須共載接車茵
相先壽語須齊和滿酌吾家太玉春

高少卿輓詞

剖竹乘軺課最多班高惟月正逶迤千齡聖主難逢際
九袞慈親奈老何尚擬鳴珂還里衙俄傷埋玉向山阿

宣仁忠節平生願有子巍登進士科

蔡知閣輓詞

抱負平生是樸忠發揮不盡古人風名藩多歷為民福
上閣頻輸在帝衷勲業有期方感會哀榮不恨劇初終
靈峰樹杪龜趺出無媿銘辭屬蔡公

親家張舍人輓詞

忍看丹旄引靈輶尚想祥華進止時無復短檠親教子
空餘滿篋舊題詩陰功會即佳城兆顯刻猶須幼婦碑

小殯西湖湖上寺冷雲秋露不勝悲

憶曾伯仲共論文迭和壘荒自不羣尚以竹林憐小阮
肯令新婦配參軍登樓無計追王粲載酒空煩過子雲
幸有諸郎傳素業勉旃猶足振前聞

輓承事黃公詞

膠庠衣鉢是青氈付與兒曹自勉旃鼎級科名彰父教
著庭勲績見家傳千鍾合使榮三釜一品終當貴九泉
留却無窮風木恨悲笳嗚咽晚春天

錢致政輓詞

教子全功次第成
吾鄉錢氏竇家聲
善根植得橋梁固
心地均教役使平
銅墨遠從欣養志
銀緋勇返了遺榮
哀榮壽考無堪恨
行道稱嗟淚自傾

劉和州輓詞

風姿醞藉發陽和
議論崢嶸砥柱波
先見不為時宰信
孤忠惟是聖心多
兩州惠愛逢人說
萬里功名奈病何
期待自慙無補報
忍觀埋玉北山阿

鄭通判同年輓詞

人物吾鄉行秘書功名末路坐題輿只教副墨傳蠻徼
不得雌黃到石渠臨事孰如仁者勇著書猶是道之餘
推尊文行銘辭好無愧當年歎起予

驚心同榜渺參辰回首龍飛四十春不慙此翁天實惜
欲論心事我誰親百年風月歸吟筆一代儀型落後塵
正爾棘心吹淚苦石塘東望更沾巾

鄭光宗節使輓詞

孝廟祥刑首選掄行藏何媿百年身共知草木威名舊
親見旌麾號令新登陸政成俄告老建旄好在庵歸真
傳家有子無遺恨千古佳城澤後人

陳紫微輓詞

三生竹素一臞仙六藝波瀾萬口傳能使聲名垂宇內
不教官職副生前松階顯揭新阡表宣室深知舊學賢
憶賦桐君贈予別忍吟薤露輓公篇

侯機宜輓詞三首

世取名科耀故鄉君家顯祖屹相望將雛近喜重偕計
有子先登服義方著從事衫元漫仕入元戎幕已交章
頭風正待陳琳檄熟路輕車痛折箱

豈以姻親篤故情最憐意氣感平生身居城市如專壑
家蓄圖書得主名滿擬歸田諳笑語何期中路隔幽明
有兒萬事無堪恨待勒銘詩作世程

掀髯握手話心期錄錄儔中獨見知官職有慚公過許
行藏無據我何為直書實行人能讀厚德深功世莫窺

有子傳家吾不恨西風吹袂涕垂頤

周和叔輓詞

不煩月旦課鄉評少日聲名老更成
百里恩波東澍水兩州遺愛蜀江城
操持堅徹神明懼精爽全歸父母生
子有筆端公不死故交零落我傷情

轉庵輓詞

無復從容唱和詩忍為惻愴輓歌詞
生前秋月春花了身後高山流水知
小阮竹林思步武仲芳蒿里得追隨

腰金埋玉終塵土萬卷千篇倚二兒

善士嚴明仲輓詞

清風元在釣臺邊分派東嘉世有傳教子以經無盡藏
活人為德不唐捐年登九九方開袞心契三三即了禪
壽得考終稱善士合將哀些表新阡

萬侍郎母夫人錢氏輓詞

親歸兒住可勝悲兒第親存各不知一世苦心天乞與
百年榮養聖垂慈共傳義激投簪語合見恩除從橐時

不及聯書朱氏母可憐惟賦輓歌詞

夫人滕氏輓詞

升堂憶昨拜慈容京兆平反一笑中可但三從多懿範
了知百念積陰功松階猛乞榮歸養吉國真如擅考終
千古難消吹棘恨可堪丹旆卷春風



--	--	--	--	--	--	--	--

欽定四庫全書

集部

涉齋集卷十三至十五

詳校官庶吉士臣吳烜

主事_臣呂雲棟覆勘

騰錄監生_臣范維城

添錄監生_臣張曾璽

欽定四庫全書

涉齋集卷十三

宋 許綸 撰

五言排律

代上皇太子壽二十韻

闔闢乾坤迥胚暉歷數長較論今鮮儷詣絕古非常八
表尊堯典千齡格舜裳孫枝綿奕葉國本係元良南極
昭穹覆東儲應壽昌九秋開令節五日屆重陽照曜辰
儀肅氤氲甲觀祥玉卮傳錫嘏瑤樂奏稱觴茅土仙潢

潤芝蘭寶砌芳元勲來闕閱嘉耦奉尊章慶事川方至
驩呼殿未央恭惟天繼體仰止日重光擬把涓埃報難
將算數量皇圖恢遠馭壽域振遐荒寢事龍樓問班陪
虎胄行神明推大尹惠養式羣方朝夕淵冲地闕瞻簡
樂堂不能鞭朽鈍何物介陵岡再拜占霄象千門祝夜
香兩宮千萬歲三聖共無疆

又代賀十韻

南極昭穹象東儲應壽昌千秋符季月五日近重陽銀

榜辰儀肅銅吹甲觀祥兩宮開燕喜萬國慶元良競指
椿為算爭持菊泛觴恭惟天廣大仰止日輝光繼體觀
行健重輪耀有常自然高宇宙何物介陵岡監古慙能
讀分僚忝接行三王真有道更欲祝綿長

上左丞相壽二十韻

闔闢乾坤迥甄陶物象新舜絃熏入治商鼎味還淳天
貺方垂節崧高已降神清明開造化精稷下星辰謙損
祗縫掖尊嚴絕縉紳怯惟聞已過勇豈遜師仁補衮工

夫細垂裳寵渥頻熱官無倖位寒士有通津水旱猶親
奏封章要廣陳棟梁須偃植海嶽待消塵自昔觀前輩
于今邁等倫調和金玉燭鼓舞在洪鈞薄海歸洪軸中
原望帝宸兩宮三聖日四海一家春少倚遐衝折重看
壽域均無官醕竹帛有節擬松筠曉日馳中使流霞出
九旻敬為丞相壽恭上太夫人盛德寧無種長年宛似
親小人因有母慚媿器輪困

上梁丞相壽二十韻

千載風雲會三生柱石緣罕聞流渚旦同在降崧年天
意開皇極神謀屬鉅賢中和垂節後嗜欲兆開先象應
魁三近聲蜚第一傳十年登鼎鉉四海入陶甄輕重朝
廷寄安危將相權朔方頻借問南國小回旋再入儀刑
肅周詢眷倚專折衝聲色外變理冕旒前照曜冰山泮
調和玉燭圓帝方張撻伐天欲靖烽煙機會寧容髮功
成即濟川長城端有託壽域定無邊不用霞觴祝唯應
寶札編昇平天下宰陰德地行仙霽色歸桃李韶光並

管絃深為修禊日全似浴沂天但樂垂裳化難酬補衮
妍清風時入抱聊寫穆如篇

上安撫程給事十六韻

臺省儀型舊垣扉寵渥新詞章闕造化論議蘊經綸去
國悲風木流年感隙塵未教居鼎鼐亦合上星辰何自
占雙使從誰問大鈞熊湘辰告入牛斗夜光陳禮樂須
賢帥湖山要主人一言九重寤八縣十州春拾穗歌時
熟投醪味德醇燕閒餘畫戟談笑且綸巾早晚登黃閣

聲猷動紫宸有儒嗟濩落無路話遠近憶拜編書賜祇
憐負弩身或疑千里馬曾遇九方歟北斗言瞻切西山
入夢頻登臨冀軒豁未敢歎輪囷

上辛安撫二十韻

開闢重華旦胚胎間世賢雲龍時際會星鳳睹爭先天
授歸三傑神謀效一編宏謨驅固陋餘論細雕鐫詔旨
傾臚句山呼動奏篇干霄須造化惟月進班聯有客占
星次逢人問日邊江湖煩鎮撫壤地屈盤旋談笑潢池

淨生成壁壘堅丈夫真細事餘子敢差肩黃屋深知切
青雲寵渥駢即歸調鼎鉉少駐斲龍泉更治今馮翊重
歸舊潁川載塗明積雪嗣歲卜豐年封殖崇陰盛驩迎
竹馬鮮恩波行處足威譽向來傳此獨瘡痍甚方疑雨
露偏禁通鄰邑粟費減月椿錢齋戒逾三日遭逢有二
天執鞭吾所慕負弩敢驅前

上周尚書內翰承旨二十韻

弱水蓬萊遠羣山岱嶽高塵埃千障隔景行寸心勞摸

索知何自樞趨苦未遭銅章披宿霧藻鑒炳秋毫穹壤
懸鵬鷁篇章抵鴈羔斯文標正脉輿論凜時髦勇退闕
吾道留行切帝褒風雲開壯觀舟楫際洪濤劍履昭魁
象詞瀾卷巨鼇合宮陳縟典華蓋祭星旄霽日明黃道
祥風動赭袍恩波榮赦草顏咫尺醉仙桃麻冊追盤詰詩
歌逼頌騷人方期補衮功豈在揮豪地禁承中旨天官
冠列曹儀型喜頗牧步武接夔臯蚤晚登三事乾坤倚
一陶途長須驥足用拙匪牛刀造請神先索推敲養莫

搔未嗟聞道晚終待郢斤操

上運使蘓大卿十六韻

當代推先正斯文倚廢興表章逢聖主衣鉢見孫曾操
履渾圭璧行藏動準繩太羹元薄味積水自增冰洛誦
傳瑰墨雞林織寶繒六卿聊率屬三事即延登一自雙
星出重煩四牡乘周知民疾苦密訪吏賢能已見江西
化都為道院稱夷塗終妥帖揆路始飛騰後進思親炙
今吾有服膺百年能幾見一語願師承令弩方危脫公

堂許驟升暗中慙摸索曾次漫峻嶒末俗惟同調初心
只自憎可能憐鶯鷁隨意亦鯢鵬

見提刑鞏大監三十韻

夙借屏星映魯憐坐客寒扁舟違逆水方丈渺三韓分
隔懸穹壤心馳乏羽翰熒煌長在望歲月凜奔湍凡骨
思全訣師資待郢墁把文留篋笥洗眼誦琅玕轍敢窮
途慟冠期結綬彈苦無蒼玉佩絕憶紫金丹往絕修門
入爭先要路看飛騰寧有策遇合自相歡獻納君王問

施行宇宙寬前星開尹幕列宿炳朝端賀老聊為監嚴
公合從官調官因有便典謁亦曾干不得瞻丰采無由
出肺肝姓名煩摸索蹤跡自蹢躅未有三千牘那能九
萬搏抱關從苑候失步向邯鄲繼憶專城去俱興欽惠
嘆第聞盤錯舊不見剗裁難帝眷從更治民風要飽觀
甫傳光禮樂已著畫衣冠浙水東西接恩波晝夜濶去
天鄰杜曲近日即長安儒腐真堪厭才優特未殫少遲
調鼎鉉即合侍金鑾餘子甘流落遺編守故殘若為百

里宰已判一生酸蜀道游雖勸山陰興未闌猶能風雪裏作意駐征鞍

別毛質夫省宣撫丘同知訪都督張知院十韻代簡
交契三生在違離百念休杜門煩枉駕力疾喜登樓擊
節聽高論持杯散暮愁諸公爭屈致故里可淹留科第
休云晚行藏却自由安邊須遠畧造膝待前籌雨泊中
川嶼風帆古括州知津君已熟惜別我何憂京口留青
眼澄江正白頭或紓知已問已負殺身酬

五言絕句

太上皇后閣春帖子

壽擬南山祝春從北斗回物華欣向泰厚德發生來
母道齊皇極韶光傍壽觴徽音家慶集隨輦奉尊章
風簾回翡翠冰研伴蟾蜍親寫迎春帖真符太上書

太上閤端午帖子

自得廣成道長居不老天底須桃辟惡何用木延年
人艾休教采仙丹久養成六宮爭結縷再拜學長生

杵獻千年實杯行九節蒲至尊親上壽家慶列成圖

聖壽閣端午帖子

有德天同壽無為日更長每逢端午節雙上萬年觴
畫扇迎雙鳳輕衣拂六銖太清元有錄抱朴不須符
繞臂長生縷當門五色絲榴花看結子葉葉在孫枝

題惠崇小景

寒林幾吹折凍柳不勝垂老去機心熟驚鷗莫浪疑
崔嵬吾肺腑面目似廬山江上風濤穩扁舟得往還

舒徐春晝永取次小桃紅獨爵把枝穩矜呼立晚風
兩蛙隨步武先後得位置不作渴雨鳴豈不賢鼓吹

題文與可山水

疎篠寒林手文家富韞材片縑雲氣足彷彿認蓬萊

題洪子恂所畫盤洲圖

林塘天遺得花木地宜栽細紀平泉咏揮毫落海苔

題車盤圖

牛磨人俱轉車旋水即流爭如霖雨足所至息人牛

歸牧圖

爵祿不入心牛肥了耕稼綠陰生晚煙歸來兩閒暇

題水石翎毛

此君已可人更着水石映水禽穿林來相呼復相應

題邊魯生花木翎毛四首

魯生往金陵招諭死節故詩意及之

綠垂朱雀柳雙燕不勝春泥落空梁語之人竟殺身
南國枇杷熟卑枝結子多一雙拖白練飛墮綠林阿
小樹生荆棘棠梨結子幽白頭雙野鳥相對菊花愁

夢斷江南信空憐鐵石腸綠么何處去二鳥獨悲傷

趙昌芍藥

風雨藥欄西殘紅落錦溪明窗時展卷春色任提携

醒酒石

澤畔三生鬼花間獨醒窠摩挲苔上醉驅遣睡中魔

小垂手

九曲
二石

醉裏忘形容山中化石仙翻同醒酒伴作對媚平泉

雲葉

何年老講師
趺坐貝樹根
落雲化為石
亦得無上尊

蜂窠石

水石兩相激
成形不自藏
終慙為兔窟
僅喜作蜂房

彩鷁詩

意適舟輕颺
夷猶雜鴈鳬
不須凌弱水
樂地即蓬壺

採蓮舟

擬倩誰家女
相呼去採蓮
丁寧欸乃曲
隨意媚晴川

雙溪堂

境與人俱勝心無水共流奇奇仍怪怪莫莫更休休

綠野堂

山坪縈霧草湖灤漾煙蘆野色誰延入陰晴足畫圖

洗心閣

與物風迎浪澄心月印湖牀頭不須易本自一塵無

容膝齋

心胷包天地人亦天地物莫笑容膝齋空洞足伸屈

樣齋

心起五湖興身輕一葉舟
箇中風雨夜不用轉船頭

楚望樓

楚東雄地望勝槩屬名流
共俟謝安石難追馬少游

題有竹軒

家世豈孤竹夷齊真二難
清風與直節一一聳高寒

題隱霧軒

豹變知非虎磻溪若是班
當年謝安石只合住東山

題巢雲軒

楚望巢雲處長懷曩寓居飄飄欲仙去渺渺復愁予

芥納寮詩

踞龜說漫游視螳談綺夢芥內取須彌撐橋尋月洞

灌園亭

植蔬常匝圃釀酒仍滿甕便覺三公輕更將德本種

次韻拔葵亭

拔葵固佳節灌園寧素餐公歸客無歸長鉞且莫彈

題飯牛亭

好手聊飯牛不將笏播插所以百里奚牛肥不枯乏

花信亭

播物潛施令司花暗弄粧封姨偏漏洩預報信前香

繭甕亭

有家堪作繭學圃甘抱甕此生足三眠以外均一夢

林珍亭

團坐聽情語移杯就果根分甘新更美敲打任諸孫

題索笑亭

江南氣候宜冷藥破寒枝能共巡簷笑何妨受雪吹

又用前韻

六出雪中宜春藏向北枝巡簷時一笑玉笛且休吹

橘友亭

梅溽香蒸玉霜晴珠照林封君休僭擬得此足投簪

題雲起亭

雲起有真意水窮無盡心盤洲寧涸澤天下要甘霖

欣對亭詩

萬象盡森著所觀皆所欣誰能忘愛惡達觀足超羣

既醉亭和韻

泛觴有何心罰爵不為耻流行固自佳坎止何妨醉

題可止亭

澗壘裴公石杯形鷗子船乘流欣遇坎結網勝臨淵

美可茹亭

盤洲比盤谷釣水鮮可烹采山獨為樂頗勝懲沸羹

瓊報亭

園丁採時果足以供嗜好眷言無盡藏孰盡瓊玖報

題睡足亭

唐皇溺太真愛心苦未足因人憶海棠何如悟秉燭

題詠亭

無塵元不楔有酒即為春一詠得真趣四時俱可人

樓亭

剝樓堪覆宇代瓦勝誅茅有酒論奇字無心賦解嘲

欽定四庫全書

涉齋集卷十四

宋 許綸 撰

五言絕句

西戶詩

勲業鏡成斑光陰箭能疾明時賞此翁不須繩繫日

月娥留照

長圓宜有缺久暈訝無風留此一輪滿須知萬古同

松陰澱瀑

松風翳漫漫澗水聲潺潺中有無塵公飛鳴相往還

池塘小景

昨夜春水生垂楊蘸波碧湖中相忘友兩兩有鸕鶿

綠沉谷

黃塵滿金谷山陰尚脩竹所以盤洲景未足趣已足

嘯風巖

人言風從虎風豈虎所出吹萬生一虛石兄故無物

泛孟巖

境佳因得水洲竊故名盤引作流觴飲巖邊聽激湍

題豹巖

奇峰疑地勝勒駕恐山靈何止管中見全闕文豹形

柞林

蓬蓬新葉盛柞拔儼分行寧作非材櫟羞為傍路楊

芝徑

辟穀幾經塵如芝今有神更開三益徑似恐太無鄰

棠杖徑

弟兄為師友晚歲共三徑室邇佇遠思東風吹鬢影

沃桑陌

種桑思采桑蠶飢那可忍日暮寒女心無衣猶反本

碧蘆步

霜葉彫殘艾寒花發舊蘆一秋明眼處落鴈惠崇圖

蓼岸

落水浮寒石看痕記舊汀更尋紅蓼岸都有幾鷓鴣

土湖

湖山遠鐘鼎往往屬田舍
公自得盤洲湖山買無價

九曲

九轉多洄洑觴行得演述
休將比金谷除此只東籬

芝泉

人但千筒汲誰知一線通
泉今人惜重走卒與兒童

瀑布

循崖瀑布懸遇坎茶鐺沸
水哉斯何取本者固如是

蒼筤澗

結實黃金包開花寒水玉香色俱可憐采澗勿盈掬

濠上

觀魚要水清愛魚嫌芰刺能了濠上樂處世何必避

魚臺

忍口嫌去乙蓄池憐所丁故應濠上樂不羨此湖醒

盤磯

新月當沈鉤香芹抵垂餌磯上坐移時水清魚自戲

鷗鵲瀨

打鴨驚鴛起忘鷗得鵜馴世間能去我物外總輸人

芡曲

湖邊誰摘芡輕度藕花風貪得鴻頭去驚他鴈序空

菱灣

根隨波共蔓花更水相親魚躍翻成出微光解照人

柳橋

眉展愁難畫腰纖怯繫書過時低拂袖誰遣颯輕裾

允橋步洪韻

橋上所經過秋成正樂郊兒童驚袞繡丞相只衡茅

墨沼

杜詩中郎石經後八分蓋顛顚

積功墨成池增價蒲為扇不作新樣脚一洗顛顚面

龜巢

藏六自為巢巢蓮歲久交支牀猶耐辱曳尾敢辭嘲

夢窟

枕上蘧蘧夢胃中拍拍春從它身化蝶誰復蝶為身

題柴桑園孤松

耻封秦爵五逃辱若逃暑孤立柴桑園出羣誰敢伍

詠槐

槐綠復槐綠時來人自忙處陰聊避影歲月去堂堂

竹屋

愛苔無愛竹戒勿長兒孫竹屋偏宜雪何妨種滿園

人面竹

共識此君面誰知面目真清風猶立懦奇節仰先民

貓頭竹

迸穴穿籬出狸奴知幾頭真能參玉版足可當珍羞

慈竹

母子惟慈孝心胃無棘荆斑衣供穉子深覺負平生

木竹

品殊名亦殊此君隨藻鑑盤洲有木竹收拾無一欠

斑竹

自得湘江種禽棲不敢彈怕搖枝上露猶是淚琅玕

方竹

峭節虛容物清標直中繩杖有削圓厄提携先摸稜

石竹

幹無筇九節葉類柳三眠介若此君操不因霜雪薦

題筍

阿戎勝此君解頤須折角玉版得細參渭川成浪謔

割椶

赤身猶幹固禿節尚毛垂木也乃如此人焉胡可窺

綠苔

土衣圓綠孕履齒孔方留莫掃錢留地應嫌薏苡秋

蘆花

見鷓鴣徐退者爲喜詎飛飛蘆欲何適繞綠打紅圍

食蕨

掇芽無掘根掘根芽必空烏糲亦彊名安得隳農功

仙茅

旌陽仙去後服餌有仙茅絕笑拖腸鼠餐餘不繫庖

黃精

白髮終煩掃黃精莫認花葉疑新竹箭根類老薑芽

正

銀箸有生香葉排元紫房更名歌九畹課效萬金方

藥畹

種藥憐苗潤分畦戒蔓滋休藏肘後法醫國是良圖

對花果子

野華復結實同在一枝上了知色即空聊作因果相

朝天李

耻為鑽核種肯向道旁生中立不阿倚惟存戀闕名

破核李

採實傍春山成蹊鄰露井和嶠難責錢計核破莫整

嘉慶子

使北帶
核歸種

名好實亦好氈車自北來流傳今轉盛見者莫驚猜

櫻桃

苦筍恰相逢勻圓得許紅薦新存古意驅鳥念園公

葡萄

架竹引龍鬚時攀頷下珠欲求西域種北使昔同符

繡橘

頌橘固多品其賢知若干后皇偏著意爾許繡團團

金橘

金橘大為貴春陵價倍增盤洲移得種風味聖全能

羅柑

織文充革見霧靄入懷香亦喚羅敷種曾聞湘水鄉

雪梨

似雪味能珍肌膚雪後身花香還勝雪未信雪如人

鵝梨

大谷固絕品鵝梨亦遺味名園見似人神臯花濺淚

綠萼梅

魂清萼綠華望絕江南使天寒倚竹時風標略相似

紅梅

梅格依然在詩家莫認桃縱煩金井水終近楚人騷

黃香梅

多葉似太繁淺裝還越樣格韻細題評遠出紅梅上

長春花

平分為四序長得作春看三友誠高品茲花一歲寒

百結

丁香從百結恨只滿東風未必愁能解虛傳酒有功

豈菴花

二月坼芳苞凡心比並交丁香多意緒和月墮林梢

崑崙桃

蟠桃微具體一歲一番開
喚作崑崙種疑從金母來

矮桃

花葉自低昂攀折人不捨
偷實定短人朔薊黃馬

垂絲海棠

遊絲颺晴空垂楊曳平地
中有海洲僊學舞金鈿墜

繡帶

天巧寧容覩春工豈待描繡
將花作帶舞觀柳垂腰

剪春羅

天亦費機巧紅葩剪似勻丁寧弄刀女故故莫爭新

黃薔薇

佳色光浮額微香露著衣枝條還更好花品世間稀

杜鵑花

鳥啼從濺血花發亦同心三月春光老映山花照林

水梔

占香名梵苑住託淨心根家住魚千里斷橋流水村

牡丹

衆卉從爭媚花開始是春一年春富貴造物太於人

芍藥

春與花垂盡惟餘九一分留春有紅藥只此自超羣

玉蝴蝶花

玉蝶正開時綠稠紅漸稀移將永嘉種夢逐漆園飛

玉繡毬花

平泉珍簇蝶道是永嘉花玉繡名吾里瑤琨不浪誇

含笑花

微拆香噴鼻低垂羞傍人花中如此粲未笑已生春

白石榴

花開水晶餅葉排青瑣窗枝紅立白幟蝶陣垂翅降

凌霄

羊角連蜷上青霄便許凌絕憐香草色莫遣逐浮萍

聚八仙

高可儕瓊樹低聊擬聚仙親看臨汝種見此不生年

虞美人草

劉項英雄志爭如溺愛何寧無戚姬草賴有大風歌

罌粟

采苗能勝片摘實可當粟餅罄壘未羞難貯杯中醪

米囊花

御米具體微有罌無儲粟妖艷耿春光佳不翅足

瑞香

紫裳蒼玉佩乞與碧紗籠怕作行雲去人間瑞靄空

麝香萱

香客忽破鼻從事宜到臍憂端集無所醉倒休扶攜

紫薇花

手植盤洲圃心懷西掖垣至今花萼上雨露有深恩

素馨

輕素梅留魄重開六月天南人雖慣見北客但垂涎

玉簪

昔見茅連茹今看花盞簪若為驚作客故有蝶相尋

紅蓮

葉側臨粧鏡波搖濯髮盤慙慙數多葉落日更凭欄

諸葛忠叟初逢家塾池中產雙蓮求子扁榜併
作五言勉諸甥

淤泥生淨質妙觀起凡心少見人間瑞誰栽滿澗潯

木芙蓉

津陸元殊種名稱偶爾同秋光波底見堤上憶蘇公

真珠花

花發鮫人泣春歸赤子還三珠原有樹疑是海中山

佛桑花

乍作槿花看榮枯漫自繁
謂桑來佛土何補一絲寒

茉莉菊

皎皎凌三夏闌城第二花
秋魂憑楚些黃額訪仙家

鬪日紅

一名落
地錦

暮色曉還開殘紅委地堆
道如西蜀錦何似北山茱

金鳳花

葉不類堯莢花疑來舜楹
風枝吹彩羽如雜九韶鳴

文冠花

厭綠不厭紅，奪朱非惡紫。了知色即空，色空奚慕蟻。

鷄冠

晦雨難渝操，朝陽易染殷。來從紀消宅，不闔但栽冠。

山茶

老枝蘖梗葉殷色，吐肥花却見凌寒。意無人為賞，嗟。

水仙

璧琮行洛佩，雨約過陽臺。正使枝難好，風標故似梅。

蠟梅

司花工剪蠟墨客巧抽脾醞藉無梅操生香認得知

顯庵許轉覓紅蕉未至絕句奉簡

境中曾見畫雪裏故依然展盡衷惟赤須輸九萬牋

後庭花

葉如花傍砌往事逐浮華舊曲惟傳恨人間復見花

逸驥

一秣志千里我欲乘騰驤圉人不在側勇氣聊頡頏

驊騮

驊騮絕代無晚去猶見畫蕭然千里姿聳立亦閒暇

馴鹿

長見幽草食誰分野草眠隨行能緩步相對可忘年

錦雞

豈以多文累輕身蹈巧機樊籠莫惆悵為汝護毛衣

黃鶯兒

鶯雛初出谷遷木寄晴花不解如簧語猶疑度柳斜

白龜

物有為身累龜靈却受鑽毛公今放汝珍重保身安

綠毛龜

五色曾呈瑞綠毛從古稀碧潭凝染色逐藻長毛衣

欽定四庫全書

涉齋集卷十五

宋 許綸 撰

七言絕句

太上皇帝閣春帖子

底須東海覓三山一片仁心壽八寰
天上有天長不老 每將春色施人間

一聲清謁乘輿來來獻雙親萬壽杯
想見瑤池同宴處 要花開後便花開

仙家樂事有常程不寫羲經即道經春日漸和風漸暖
不妨排比冷泉亭

太上皇后閣春帖子

補天立極寄何言婉德同歸太極尊德壽宮中康壽殿
春來別有一乾坤

廣成得道自崆峒少廣功成閬苑中自是仙家春不老
蟠桃枝上又春風

金花綵勝一番新白玉卮旁祝聖人聞道瑤臺花有信

宜春更有八千春

皇帝閣春帖子

紫宸殿下迎春仗德壽宮中家慶圖帝有雙親齊萬壽
天教五嶽總三呼

協風初轉斗杓旋即是流虹紀瑞年甲子一周天啓運
威儀重見漢中天

清臺方奏五星明又見春盤憶兩京見說黃河方混混
翠華來復始教清

皇后閣春帖子

雪融鳩鵲金鋪暖
冰泮蟾蜍玉漏遲
壽却兩宮春日酒
自書卷耳進賢詩

龍樓問寢正鷄鳴
玉佩丁東曉氣清
春入椒房偏起早
三茅觀裏未鐘聲

不要梅花比玉容
柔柔枝上要春風
聖人見說常躬儉
擬助君王賞戰功

太上閤端午帖子

久瞻黃屋見堯心
盡把薰風入舜琴
至樂殿中香一炷
靜看周易對槐陰

艾枝簇虎關時新
荷葉巢龜薦瑞頻
自是仙家多樂事
天中佳節近天申

傍階葵萼傾紅日
映水榴花染絳雲
魚戲亦知天意樂
行行吹起碧波紋

聖壽閣端午帖子

宮人晨起靚粧梳
艾葉菖花獻頌餘
團扇裁成留不畫

應時只乞聖人書

陰陰密葉韻黃鸝樂事宮中聖得知
永日留連惟史帙薰風拂掠到琴絲

駕言康壽殿中來排備涼亭與月臺
此去天中纔半月從今日日要花開

皇帝致齋

聖主憂勤二紀年宸心久已格皇天
五風十雨如何報八陞圓壇具告虔

一夜飛花滿帝城
曉看玉殿月籠明
紫宸拜舞山呼了
都道郊天管定晴

丁當玉佩趣班齊
山立千官請致齋
見說內家清似水
多時排當不曾排

奉引靈駕至陵所方雪

禹穴如今即舜梧
攀髯誰識小臣孤
雲頭閣雪不忍下
知道孤臣淚已無

上黃參政壽七首

人間元自有三山不在虛無縹緲間
山上仙人圮上老
一編親輔漢龍顏

誰識金仙抱送時年年惟有早梅知
只今不負調羹信
造化工深物自私

諫紙臺評字字溫補天勲業妙誰論
風霜却是為霖手
桃李恩深更不言

涉五經旬一風雨三邊安帖屢年豐
但知風虎雲龍會
不見彌縫輔贊功

補衮工夫日線長
天教嶽降傍新陽
都人擬看貂蟬出
親受君王飲福觴

自有中興太學來
我公今始拜公台
胚胎元氣真難事
五百年間命世才

度量汪汪見古風
衮衣只與布衣同
定知耐老耐官職
幾個中書郭令公

又上梁丞相壽口號十首

恭惟炎運恰中天
間氣真成五百年
以舜繼堯方誕聖

維申及甫即生賢

石筍金鷄傳地識鳳池虎榜屬儒真向來再世方稽驗
今日兼榮孰比倫

徃分南國戎夷問再入中台宇宙和狡兔漫為三窟計
長城只倚一賢多

慶成禮就端成殿上壽儀陳德壽宮霽日祥雲回頃刻
變調妙用不言功

天數已周花甲子中原合見漢威儀極知廟畧歸樽俎

倚看元勳上鼎彝

真人得道自崆峒萬國同歸壽域中
致却升平更何事
朱顏綠髮侍重瞳

殿家前日中和節相府今朝嶽降辰
勅遣紹璫宣賜酒
黃封題作百千春

萬里雲霄行白日八荒桃李自春風
不須更棄人間事
一轉鈞陶九轉功

曉來微雨弄新晴
晚看蟾光一搦明
學語小兒爭祝頌

相公長似月初生

乾坤長物門闌客會計叢中委吏身擬筭中書都幾考
直須東海看揚塵

勸農口號十首

一勸農家莫惜農春來雨水已流通有男有女勤耕績
必定時和更歲豐

二勸農家奉二親爺娘養爾望終身但行孝順勤耕種
天不虧人不到貧

三勸農家敬主人種它田土耐辛勤若圖借貸相憐恤
禮數須教上下分

四勸農家勸主家去年早稻失收多未還舊欠無從出
隨力周旋更借它

五勸農家勸善良冒耕逃絕更思量官司既許從今首
好與兒孫做久長

六勸農家勸北鄉北鄉田少盡茅岡早禾有種何妨種
勝似閒教滿地荒

七勸農家趁雨時陂塘蓄水是便宜衆人殖利還他殖
自飽須知別箇飢

八勸農家莫鬪爭到官寧免廢農耕欺公畢竟添煩惱
作善安平過一生

九勸農家納稅租莫教縣吏更追呼只催常賦他無擾
合體公家有與無

十勸農家各力田長官無補近三年民淳訟簡因藏拙
謝汝分宜父老賢

勸農畢事呈同官

偶遵令甲得劭農詞鄙唯期與俗通
乍可催科成政拙且須憂國願年豐

與民三載幸相親試邑何功得庇身
他日去思無可紀較量惟只有清貧

扶犁感爾隴頭人自古民生合在勤
五斗空餐慙令尹可憐無補及毫分

艱難功業屬皇家每為農桑下詔多
濫撫一同何補報

祇先勸課未皇他

次韻才叔初春絕句

柳眼雖舒未展眉
逗寒陰雨故逶遲
潘郎袖却春風手

正想經營得句時

帶圍過膝杖過眉
曲廡尋詩得步遲
舊日春風應笑我
鬢邊殘雪沒消時

次常之暑中即事韻五首

自芘槐陰影更重
悠颺午夢半醒中
已看新綠看濃綠

不愛深紅愛淺紅

破暑薰風破甌輕井泉新汲濯新清
亂蟬為我翻多事
時有黃鸝一箇鳴

近鑿方池漾碧虛
手栽初產玉芙蓉
丁寧未得輕開却
少待嘉賓約望舒

勸翼歸來足退藏
卑飛決起自回翔
昨宵妙處無人領
不是風涼是月涼

晚雲蔽月氣微清
假寐齁齁鼻自鳴
起看青天淨如拭

月明於我不無情

次韻才叔和陳大用七夕絕句

百兩新迎碧漢車半奩舊照古銅磨蟾虧既望圓時數
鵲別經年恨處多

小說無端漫五車流傳繆處盡刊磨杜陵堪笑還堪惜
吟到佳期奏雅多

寧少公榮莫少車良辰僧坐笑磚磨詩翁不至惟詩至
好句雖多恨亦多

入秋逢節重星車今閨中秋有折磨夜夜銀河映牛女
稍涼相過望君多

中山九日

戀闕懷親一性成車夫解事趣歸程松醪菊葷中山驛
薊北江南萬里情

蔣十一丈以重九雨昨有詩約閨九二首次韻
風雨滿城佳節休詩翁強項覓因由不須閨九方為節
眼底黃花即醉遊

誰念淵明載酒過杜陵愁思只悲歌
催租豈敗潘郎意
語到愁邊自不多

冬至早起

千梳短髮儼如霜起坐中宵待一陽
人道陽生少灾障
才無韞線敢迎長

百念消亡不動灰猶憐雲物擬登臺
今秋幸自豐登甚
底事終朝隱隱雷

百里雷聲足震驚地溫春近易敷榮
故人新有催梅句

催得陽和太半生

曉起

晚暮花房露霽霏
曉綳初脫笋芽肥
海棠已退來禽舍
滴滴胭脂正滿枝

莫想思堂想表勲
鹿村佳處正相親
花時不拚聊中酒
虛過清明箸莫人

案箸莫未詳疑即遮莫者莫之意當時方言傳寫之異也

新月

碧漢新磨印
甲痕山頭忽墮玉
鈎寒澄江只在青山外

憶得垂綸七里灘

燕賓館值雨

飽死侏儒便雨立
安知更有漢官儀
諸生未免諛綿絕
從俗從宜我自嗤

已晴復陰

漠漠輕陰養絮天
長空跼跼墮飛鳶
東風吹得浮雲綻
一片斜陽在晚川

弄晴斜日展仍收
一向寒雲凝不流
次第今宵還是雨

自添香炷煖衣篝

讀了殘書不奈閒
按抄老眼傍闌干
吟成白雪知何補
未有功名與世看

到京城日積雨欣霽

驅車日日望京師
冷雨瀟瀟共淚垂
一掃頑陰朝故闕
天開地闢亦如斯

新晴

暖日烘晴麥正秋
麥田高下五分收
稍蘇凋瘵天之力

賑糶新來減幾籌

午暑睡起忽懷范武子走筆當簡

讀書巖中范武子爾有此地何時歸巖邊有石不可煮
世間萬事巧相違

火雲爍石畏出戶正似雪深堅卧時吾甘飢凍死即死
觸熱生慚襌襪兒

爾近添丁亦可喜丁多何補於明時除却操戈與執耒
此外文墨徒爾為

暑風翕翕樹頭動吹過井梧方是涼拂拭桃笙陰處卧
誰知我亦出羲皇

睡來只有茶一盃共啜何人眼暫明忽憶都錢范監庫
種來脩竹似渠清

爾家阿換秀而溫三歲知音可共論唱得癡頑三昧曲
新來何似許監門

次常之韻

清徹郊原帶遠洲霏微小雨勿供愁重陽已近休仍例

今歲豐登別是秋

呈張功甫

乞得雲臺散吏歸園亭物物有光輝
臨湖更要波光濶
付與沙鷗自在飛

插來楊柳已梳風
乞與漁師泊短篷
歲晚蘆林總搖落
隔湖認得老鄰翁

籃輿軋軋上梅橋
玉照峻嶒入望遙
梅與主人俱舊識
一年詩興又相撩

次韻居甫六絕句

君家城市儼山家，翠竹疎松靚物華。
月桂似知新有句，封姨恰獻旋開花。

自入春來少見晴，雨愁花思共冥冥。
浮紅吹却渾閒事，正要秧鍼出水青。

際天空翠滴人衣，拍岸波紋泛渺瀰。
有意雨聲停白晝，無端草色上朱扉。

雨飛蝴蝶盡爭高，映水垂楊拂小橋。
乍覺烟村風景別，

突看林外出緇桃

夕陽綻處動歸舟
照眼明邊是白鷗
只聽前湖歌款乃
不知風雨轉船頭

西湖弭棹曲廊腰
休憶長橋復斷橋
隨意吾鄉度寒食
登臨不費酒旗招

次諫長韻贈嚴處士

鳶在青天魚在川
馬牛誰絡更誰穿
過求敢問君平卜
只問皇家一統年

喻工部追和王詹事游東坡十一絕亦次韻

宇宙聲名宇宙容豈無湖海著元龍
黃州詩興椎輪耳
詩到儋州興更濃

賢者行藏只委天山川却自以人傳
幾年荻棘東坡地
不祇人賢地亦賢

護持風物感波神翁去如今隔幾塵
海上跨龍時一到
雪堂烟烟見斯人

明月清風轉施樓武昌樊口直黃州
天公不借蘇仙使

兩賦那成赤壁游

海棠一樹立山村桃李場中合斷魂
從我東坡三子在
休悲六客更誰存

故人相戒莫吟詩那免斑斑露一奇
無奈西湖頻入夢
果然吳餉却來時

男兒何苦自拘囚六合無非汗漫游
喚取東軒同抱耒
瀟瀟風雨正筠州

見慣沙鷗已不飛旁人相見莫相疑
無端却為魚蠻子

又著危言感聖時

海內傾心雨露詞種松爭忍十年期臨臯五見分新火
只比先生睡覺時

歸來宣室恰新年筆下生成又補天喚作玉堂堂喚雪
不知若佞若為賢

腐儒珍重百年身眼見白頭無數新晚歲江山縱搖落
平生出處長精神

懷德久仍調爽約

南北峯高金突兀
短長橋遠碧琉璃
轉庵好借魚莊住
處士仙來剩欠詩

葵萼已傾朝霽日
榴花猶染晚歸雲
不知荷蓋添多少
定自湖光減幾分

得句寧如餐玉秘
食言可似雨梅肥
暑中縱愛持竿手
夜後何如載月歸

嘲少年

守舍看家老者便
少年爭逐艷陽天
新花日買添新水

肯信翁心尚少年

外舅嫁遣二侍兒有詩次韻

詩翁學力有長城笑語叢中漫鼓行
出水芙蓉寧受汙鉛華洗盡見真清

江西劉謀卿秀才以火焚其居諫長序其事以告袁吉故因題其後

祝融回祿愛君深却以無家到武林
諫議一篇如見面故人爭不動仁心

讀王文公詩

文章與世為師範經術於時起世仇少讀公詩頭已白
只因無奈句風流

再讀雪谿志詩


誰無曾次著林丘脚底黃塵到白頭不羨雪谿成卜築
羨他卜築備歸休

纔啗盤谷還思隱試說柴桑便憶歸何處山人高索價
老腰猶要萬釘圍

萬古功名米一稊此身只合把鋤犁可憐歲晚鄱江畔
再讀前賢志雪谿

淨慈致齋侍者求三教贊

休問船來與陸來桃源到處即天台雙林做底須知會
認着形骸亦苦哉



欽定四庫全書

集部

涉齋集卷十六至十八

詳校官庶吉士臣吳烜

主事_臣呂雲棟覆勘

謄錄監生_臣張曾璉

謄錄監生_臣卞蘭發

欽定四庫全書

涉齋集卷十六

宋 許綸 撰

七言絕句

題所藏二修禊帖後

昭陵脫手已非真
石本流傳喜似人
澹墨似肥濃似瘦
驪黃不見見精神

契師欲予隸書為此以贈

契師畫得梅中趣
急水溪頭印月時
昨夜卧披今起看

自宜重圻向南枝

次韻薛奉常以詩送瑞荷花并圖而花與圖俱

不至

並目蓮房併根藕流傳樂府已稀奇
平分葉葉紅兼白
絕憶公家瑞綠漪

昨夢前塵假合來刻舟求劍記蓮栽
花圖詩卷聞烏有
猶望荷花舊處開

題畫卷

平坡軟草細芊芊碧樹遙枝綠蔭圓羊豕自如知飽後
牧兒箕坐得安眠

巖壑林坳景趣幽等閒鷗鷺亦夷猶承平人物佳公子
游戲丹青翰墨侯

著莫池塘浩蕩秋露荷風荻冷颼颼雙鳬乘鴈自尋伴
孤鷺無塵不解愁

弄色堦前各一家賓秋餞暑度年華道人落墨聊游戲
認得真為金鳳花

擎水端如治大兵
兒曹何事解關情
等閒戲劇休成惡
兩箇俱雙莫撓清

釣有嬰兒伉儷情
山川其奈險難平
如何一得戎夷俗
長使中原不用兵

諫長之門人曾君三異作招隱圖并賦二詩以
招諫長之歸亦賦二首

謝公雅志在東山
其奈蒼生債未還
寄語故人專一壑
不妨清夢落滄灣

能畫能詩已可人迷途前畔更知津
眼看益友如君少
我亦歸心動白蘋

王晦叔惠聽雨圖次蔡韻奉寄

并序

丙申仲冬予以告糴至天長令君王晦叔出所藏書
畫有蔡公天啓聽雨圖予擊節愛之蓋蔡所畫者平
岡老木遠水歸雁作蔡卧小舟聽雨者滕公令戩筆
也蔡又以二絕句作小楷凡二百五十七字跋其上
以遺其叔祖王公彥舟皆精絕晦叔作字有徐季海

風氣暇日從予假金石刻酒行謂余曰予絕愛子唐
開河碑顧未有以博此者予戲指屏間聽雨圖曰此
足以當之晦叔笑曰非吾家舊物直不靳于子矣後
月十三日晦叔還自淮陰瀆頭頓所苦暴下予是日
亦往高沙轉粟以書告別且曰開河碑或果欲之第
意所欲捐者得一種足矣繼有皂衣乘急騎追予舟
至五里許出卧披畫軸則聽雨圖也予既嘆晦叔能
割愛以取好明日舟行過小五湖水天相接雪意垂

垂孤雁呌羣洪濤拍枕因感蔡跋語有自作詩畫今
六年而終踐之語紹聖丙子至今復八十年矣而予
既得畫宛如所更感慨久之乃次蔡韻以寄晦叔且
為佐書蔡跋以當畫記云永嘉許某深父

拂拭滄波遠接天摩挲喬木老生烟題詩作畫人何在
萬古蓬窻一覺眠

常日京華藪澤思六年身悟畫中詩須知妙處無今古
得畫還如聽雨時

題張野夫所藏顏持約大招圖

顏君思似龍眠苦賈賦傷于宋玉悲萬古忠魂元不沒
令人惆悵大招詞

題洪子恂所畫盤洲圖三首

昔見園成今創始今為圖就有聞孫長松鉅竹知無恙
直節清標想故存

摩挲指點經行處盡和詩篇二百餘已是步趨瞠若後
或看晚節在歸歟

有筆堪耕須苦志無田可種莫憂貧
細推方寸遺寬地
有此孫枝亦可人

題浯溪圖

山川自昔因人勝豈愛浯溪愛漫郎
不得中興攄老筆
兩章秋月漫爭光

跋諫長畫軸後五王按樂圖

玉笛牀頭取次橫自吹頭管按新聲
梨園舊譜今何在
一段風流畫得成

題曉蓮圖

生綃未展已生涼
白白紅紅映兩廂
賴得轉庵先著語
幾成虛送許文昌

闕蓬圖

楊子長條玉作葩
花光凍棘眩冰花
短蓬幾見空相似
捕影圖成試喫茶

游鯨圖

碧草差差泛綠猗
未施魚影樂先知
遙憐盤礴明窗下

便是濠梁得意時

題瑞寧草蟲

候蟲微細欲何為
卻與鵬搏共一機
須信人心關造化
蜻蜓能點蝶能飛

題潘德久所藏楊補之竹梅

竹弟梅兄已可人
老楊筆力更精神
轉庵不用持相惱
買得梅坡入夢頻

明日欲對通夕不成寐
枕上賦墨梅詩還契師

宿逋

師住一庵幾何年山深更過靈隱前遺我江南幾張紙
中有寒枝真契禪

蒼顏幸沒黃塵裏清夢忽墮孤山涯處士橋邊卷蓬相
癡兒莫訝得香遲

昔看灘頭印明月今觀海底拾玄珠自從迦葉天機淺
不但花無筆亦無

春風不逐花光老心印自傳圓契師師能寫出夢中夢

我却吟成詩外詩

聽湘西許老彈琴

顏裡常春鬢已秋
抱琴時與破牢愁
自言舊曲都忘却
彈未終時且罷休

聽德久彈秋思詩

潘郎胸次有經綸
指下聲如筆下真
已是不禁秋意思
更彈秋思苦撩人

十四弦

馬上征人濕擁氈猶將愁思曲中傳向來有句真成識
小雨斜風十四弦

次韻才叔聞笛試燈二絕

疊石為山漫崛奇玉峰欣對似相知梅梢頂上吹霜笛
却惜流香過別池

相逢一笑即銜杯梅與詩懷得共開但有燈光并月色
不須元夕始重來

馬上口占詠席帽

本是田間荷笠身不堪重戴壓烏巾苦無諫語遮羞得
其奈旁觀冷笑人

送越賤與才叔次韻

剡藤分送意何如擊鉢聊供腕脫書飛動要觀廉蔭氣
此賤斷不與曹蜍

銅雀臺瓦硯

千年銅雀蔭歌塵張老澄泥解逼真我有古端鈞玉德
中涵雨露炳星辰

和人惠詩作素馨油

萬桂叢中不記年行藏極處只由天
朝回若問南湖叟依舊山邊復水邊

晴窗一縷海南雲徹骨風流自可人
由作桂油膏面樣不妨粉念混天真

劉知監端午前一日以詩送甜苦筍末章有謝
絕香蒲與酒壺之句以五絕句送酒

感君親與愛相兼世味諳來已屬厭
惠我西湖甜苦筍

為言無苦只知甜

經月梅林掃迹晴照人湖水拍堤平軟紅塵裏偷閒客
處士橋邊取次行

新來懷抱少人知自入修門未有詩鳩自呼晴蛙喚雨
羨君湖上看西施

一沐未還旬日謁片言敢折累年囚杜門莫羨過僧夏
多雨方愁損麥秋

湖光可吸太清孤漁父鳴鞭少得無幸自有詩鱸午節

不應無酒住西湖

中山酒

中山一醉百經旬
魯酒千盃不醉人
莫恠近來風味薄
中山久已雜邊塵

次韻才叔屠蘇絕句

底須却鬼寫靈符
一盞侵晨不可無
老覺東坡翻倒置
奚為後我酌屠蘇

望商山

符離東望即商山畫出江南見一斑社稷未能還漢舊
豈容四老老其間

入泗州

越境張旃入泗州隔簾翁媪拜含愁可憐萬折朝宗意
誤爾尸臣死亦羞

靈壁壩詩

入泗行來汴似渠壩成靈壁水全枯汴流可過從渠過
思漢人心過得無

臨淮望龜山塔

幾共浮圖管送迎
今朝喜見不勝情
如何抖得紅塵去
且挽清淮濯我纓

渡淮

照眼清淮笑力微
家人應喜近庭闈
茲行莫道無勲績
帶得星星白髮歸

次韻德久舟行阻風

昨日顛風鳥雀喧
牽夫寸步不能前
今朝收纜張帆坐

世事乘除只偶然

渡江

時禮物
船被風

揚子江頭渡曉風一舟掀舞浪花中
江神似恨頻將幣不許和我出漢宮

題金山寺

水月光中全體現波濤湧處定珠圓
每因王事參差過更羨仙山晻靄邊

宿南京

詢訪實有成
兵三千人

虛說營屯五萬兵淒涼無復舊南京
中天王氣終當復
千古封疆只宋城

釣臺

敢將出處較秋毫未報君恩感二毛
七里灘頭停短棹
細看漁父亦清高

過馬當山

彭郎磯頭晚更涼扁舟暫過紫魚香
買魚斫鱠初傳酒
頃刻風帆過馬當

登第一山

登臨休作楚囚悲
遮莫人心知漢思
疇昔百聞今一見
旆報國在男兒

幾因護客數登臨
悵望神州久陸沉
今日登臨身是客
經行應切此時心

淨社山中即事二首

拾得閒身傍佛廬
吟邊不解着工夫
晚來好處無人領
淨社山中聞鷓鴣

家童裹飯就僧家飯了僧來共點茶聽雨軒中無一事
薔薇却有旋開花

遊三茅忽得佳處留贈鄉黃冠師

三茅觀裏僊為宅七寶山頭玉作堆不盡經行奇特處
只教留作等閒來

為山

疊石為山底用高經丘薦嶺欲平橋青林屈曲崎嶇過
疑有碧花無數桃

次韻薛奉常清涼山靈潭寒瀑二絕句

清涼山中冷難宅中有靈淵人莫測劃開神祕奉常君
萬丈寒泉貯穹壁

田家要雨隨即雨豈識潛珍在中止霏微不絕自成霖
萬古禾頭不生耳

再和奉常靈潭寒瀑韻甚有同遊之意

奉常如僧逃火宅天與淵泉誰識測我今亦是閒散人
何日躋攀臨峭壁

對床盡聽風雨情同胞兄弟亦何止試於如夢境中聽
雨聲水聲風過耳

次韻誠齋寒食日雨中游上天竺

詩翁作意與春期寒食翁來春合知不是春工渾忘却
好題詩是雨游時

晴即飛塵雨即泥乍教泥滑得行遲貪看花處籃輿舞
靜得句時流水知

可是前身住寺僧未經行處恰如曾松杉夾徑當前導

莫惜綸巾冒雨行

驚人詩句任人嫌
詩得春來思轉添
莫道詩翁太奇崛
思如春溜瀉層簷

天竺精廬晝靄中
簾輿初歇袖初通
回時管勝來時節
屋角微微轉相風

不比尋常夢阿連
山中真箇著行纏
野花已放名花未
回施風光與少年

山花壓溜水通池
時有幽禽自在飛
日脚忽隨雲脚露

鐘聲恰與梵聲齊

溪流來自寶峯頭流到欄邊不復流
拔開放泉聊戲劇
怒湍平後一齊休

老僧雪頂接霜髭並日楞嚴手自題
見得眉間多喜色
定應行處有新詩

布地黃金間碧疏歸依大士攝心初
功名骨相元何有
身口業中除得無

晴嵐冪冪水潺潺歸步花光夾道間
中竺已游游下竺

冷泉亭畔更登山

紅滿園亭綠滿郊
愁風愁雨豈天教
留將畫舫臨湖側
認取青帘出杏梢

不枉皇都九十春
春行樂有誰貧
休論舊雨兼新雨
何限今人念昔人

詩句纔成雨又催
時時只倚十分杯
誠齋筆下詩何數
不祇晴來雨更來

明時與物總為春
樂處陶陶即是真
勝賞不妨閒信馬

名園莫問屬何人

玉勒金鞍問寶裝少年有意競春忙不妨繫日寬門禁
安得長繩爾許長

欽定四庫全書

涉齋集卷十七

宋 許綸 撰

七言絕句

車行詩

穩如江海迎潮上
險似虛空逐電行
縱使中原平似掌
我車只作不平鳴

陳留道中

雍丘紆路到陳留
積雨瀰漫漲畎疇
道左流民形似鬼

能無百里為分憂

靈壁道傍石

花石網成國蠹盈賊臣賣國果連城陵遷谷變猶橫道
反作傍人座右銘

朝歌城

魯牆絲竹千年在寂寞朝歌莽一丘突有浮屠延望眼
何因駐得墨家流

美里城

至今城中
草不生

扁公墓下父猶榮
美里城中草不生
豈是聖賢遺恨在
只應天自不能平

趙故城

叢臺意氣俄銷歇
故壘歌鐘幾劫塵
只有蘭卿生氣在
墳前衰草鎮如新

涿州

薦直中原掌似平
范陽巢穴奈天成
未能太古全無事
黃帝如何不治兵

衛州

河決從來國隱憂
衛州那在水邊頭
傷心中土淪胥久
可但堪嗟一衛州

樂城縣

寂寞樂城頓食遲
令君跪告簿尤危
固非鸞綬身棲棘
可忍鴟巾首告笞

慶都縣

慶都將過過唐河
欲訪靈臺去路賒
試問車夫能指點

好峰無數碧蓮華

栢鄉縣

昔賢不肯入朝歌
况乃軍中忌諱多
咄咄衣冠出疆去
迫於人處竟成訛

淮陰縣

甘羅古篆娑羅刻
豈但淮陰妙二羅
胯下橋邊有男子
追亡擬問漢蕭何

和素同年接伴賡從客
陸成父至淮陰縣韻

日月光中盡徹侯獨全終始是封留可憐膝下奇男子
雖媿淮陰不媿劉

和素同年接伴賡從客陸成父至寶應縣韻

雨洗秋光滴夜涼斗牛河漢絢文章明時不寶埋光瑞
應有真賢為發祥

過相臺

夜深吹笛醉秦樓月白風輕只共愁魏國九京如可作

錦衣能復故鄉留

月白風輕
亦樓名

過陳橋見太行

驅車夜半出都城策馬陳橋已半程回首白雲南闕下
太行何事馬前迎

過龍德宮

龍德宮中舊御園繚牆栽柳儼然存秋光更向牆頭發
似與行人濺淚痕

過常山村店中見菊

黃菊娟娟晚秋等閒野店亦藏幽國香何恨成淪落

秋月春風不解愁

過趙州石橋

橋梁顯刻認中朝仙跡遺風不可招
喚作沃州人不識今朝只過趙州橋

奪玉石橋

輦却民財積上京民貧政自不關情
瓊臺要築猶餘事何況橋成奪玉名

漳河

出郭安陽漾碧波黃流汨汨泛漳河河濱飲水令人癯
岸石其如腹疾何

琉璃河

黃河九曲固難窮六里琉璃未長雄眼底坳堂君勿詫
使華來自水晶宮

護龍河

門題善利遏朝宗一水何從更護龍菱角雞頭教偏仄
可堪遊女折芙蓉

汴水門名善利
過此則為護龍

魏河

過却黃河有魏河
燕山直下有通波
不須圖寫山川勢
它日因糧省索駝

易河

車麟麟逐馬蕭蕭
易水無聲瀉汰寥
只聽琴聲已蕭瑟
更行霜月更聞簫

白溝河

藝祖懷柔不耀兵
白溝如帶作長城
太平自是難忘戰

休恨中間太太平

滹沱河

逋誅狂寇釜中魚未免真人駕六飛
千古石人雖曖昧一時河伯太機微

歸途觀蘆溝新橋

長虹如玉跨長川下馬摩挲得細看
他日燕郊如舊識蘆溝橋下古桑乾

歸途感河南父老語

河南民力已無堪泣訴王人語再三勤苦遺黎姑少忍
北人何止棄河南

有感

宋衛綿延接趙燕古來爭戰可勝論細思醉把乾坤擲
蠻觸區區匪大言

文王廟

聖賢多難古來同易數身更美里中甲子既周屯既復
不應天數竟終窮

光武廟

真人祠殿栢鄉邊
下馬焚香我謁虔
思漢民心今戴宋
密祈興運早中天

題蕭相國廟

古廟淒涼古鎮邊
鄧陽戶口更淒然
封侯當日如今日
越使蕭公剩買田

題曹娥廟

當日曹娥念父心
千年江水有哀音
可憐七尺奇男子

忍使神州半陸沈

謁曹娥祠

時積雨後

昔因淑節歎男兒
今媿男兒竟未奇
攜累乞靈無可禱

只求晴霽樂豐時

予舊時有可憐七尺奇男
子忍使神州半陸沉之句

避雨漁陽太守廟

拂面秋風雲漠漠
傷心古汴黍離離
不因避雨漁陽廟
爭見元豐大觀碑

曹操冢

舜葬蒼梧的可知九疑猶是後人思
阿瞞不作瞞心事
何用纍纍多冢為

寓居婺倅廳秋夜觀書有感四首

虛庭撼撼撼梧楸黃卷青燈字字愁
說與西風莫蕭瑟
年來詩思不禁秋

每當劇暑憶秋期暑退涼生喜可知
不奈寒蛩促機杼
等閒催得鬢成絲

子城高處易為秋密點催更響更幽
掩卷不眠階下坐

淡雲東去月西流

四十男兒不自憐
求田問舍計茫然
一官未辦君親報
縱有田園亦舍旃

戊申歲題玉牒所壁

擔上看梅不是梅
孤山消息限蓬萊
仙源園裡逢人日
雪色憐隨霽色開

雪塢霜窗合斷魂
仙姿元住水邊村
園丁莫訝盆池小
留得踈踈澹月痕

空飧無補愧侏儒
茗盃香爐細讀書
還被梅花勾引破
又哦新句步庭除

冷藥踈踈開可數
香風冪冪遠能聞
不因脩竹遮攔得
一夜清寒定憶君

數日清寒不肯開
枝頭閣雪冷皚皚
霜禽飛去花身動
一片清香在綠苔

直舍孤吟未過清
梅花相與有詩情
寒鴉真似隨人好
寫就新詩啼數聲

書潘德久版壁

故人有詩仍有屋
困裡無禾鼎無肉
可憐驅去傍人門
階下蒼苔孕寒玉

山房

山城久矣鞠榛埃
三徑新成手自開
何用誅茅卜鄰並
好風良月便應來

去盡陳言掃盡埃
詩清心與眼俱開
由來野服關吾事
暇日能同竹院來

徑掃蒼苔磴拂埃山房今日為君開
丁寧杜宇莫催去
正要青山歌竭來

風掃飛花雨濯埃錦葵將發麝萱開
思量造物恩何厚
看取南薰入抱來

西山爽氣

負牆結檻太羸踈真得西山爽氣無他
日常陰無可紀
負暄曾此鑷髭鬚

金果園

暫拋汴岸入斜坳金果園中信馬行滿目桑麻俱沃壤
可憐持節看春耕

柳溪

通衢暖轡出邢臺突有池臺號柳溪自過淮來無此趣
千年華屋但雞栖

望平山堂

霏微晚雨濕踈鐘彷彿浮圖出半空回首江南山色遠
平山却在有無中

蜀山堂

已把堂名占蜀山
愛山猶疊石孱顏
世間何事非兒戲
了得兒癡趁得閒

蜀山亭

千里肥川掌似平
崔嵬只有蜀山青
茲亭巧與山相對
不惜名堂更揭亭

題忠孝亭

白石陂頭斬逆蘇
士行却是晉夷吾
功成不掩窺窬志

忠孝何如卞大夫

浮槎亭

浮圖立處認槎峰
曾記浮槎是醉翁
亦似平山堂上看
陰晴山色有無中

題陳正字貧亦好齋四首

陋巷當年一窶人
簞瓢樂處有經綸
居然更起為邦問
豈是先生亦厭貧

只教求食傍人門
彭澤何妨作令君
鄉里小兒真解事

歸來草木亦欣欣

腸日九迴諳世路肱今三折悟良醫戎郎何自知貧好
却是歸來遠客知

正字如何例姓陳飢來一字不資身更將長技為扁榜
肯信吾家亦有貧

題漕司涉齋

涉世渾如涉大川風波過過却愈拳拳朱簾畫舫非吾事
只合扁舟聽雨眠

茅齋

市近吾營地自幽身閒何羨水中鷗因思客路竿遮日
得似君家茅蓋頭

梅坡

買得梅坡與衆看折花教折莫催殘蚪枝裹蘚能炊玉
留與梅坡伴歲寒

松林

蒼髯老氣已雄豪偃蹇連延結虹橋當暑含颺時瑟瑟

底須屋角相風招

欽定四庫全書

涉齋集卷十八

宋 許綸 撰

七言絕句

信筆戒子種花木

君恩未許乞分符
三徑無資地亦無
或借或資分養種
閒時趣早着工夫

廼翁未遂投閒計
吾子宜殫幹蠱才
已辦一區供戲綵
更營三徑待歸來

一年活計在春初處世光陰不可虛莫謂窺園全廢學
昔人猶有帶經鋤

栽種成陰動十年風流遺恨憶蘇宣西園近有移園法
大樹根盤只儼然

買宅慇懃為海棠却因改築遂移將前園褊小鄰遷次
好補霓裳斷續行

池妨屋地故應填取土成池却自然愛惜清漪添淤壤
買根歸種撫州蓮

買石雖非自鬱林
窠窠盡費俸餘金
傍人應笑謀生拙
航海梯山枉費心

買石為山任笑癡
癡翁真箇似童兒
竒峰峭石勤收拾
莫使他年一簣虧

我山壘土仍栽石
下有嵌岩上有亭
石少闕邊添種樹
種時須要樹長青

水仙繡菊麝香萱
久種成畦長養便
分向北堂三益近
遶牆秋色要爭妍

種樹還如種善根自須積累付兒孫從人覓得栽培法
綠葉成陰便滿園

莫將桃杏等閒看栽接名窠有幾般為是開花仍結實
花供賞翫果供餐

飛霞園地固無多我愛他時號繭窩若繚城跟踈織竹
錦屏環列繡成窠

金沙安敢齒醪醪白白紅紅間却宜但是籬邊多種取
他年步障要相隨

梅花十首

每憶山居氣味長
梅花時節只清狂
若教玉鑑堂前看
認得花光是玉光

詩到西湖更不疑
西湖以外可無詩
孤山水月無邊思
只在清香不在枝

一頃園池半種梅
更將窠石傍梅栽
愛風愛月隨宜看
合是詩家帶得來

隔水尋幽妙莫傳
一年勝處是春前
縱饒爛熳春吹却

猶得殘香伴鶴眠

玉川夢事不紛紜一樹相思正憶君
君若移舟來問訊莫教驚動一溪雲

為愛林林次第開却須雪壓與霜催
歲寒偃蹇非無意破冷衝寒來幾回

去歲來時恰犯寒枝頭未放雪漫漫
一年鞭影紅塵裏猶得西湖立馬看

湖上歸鴉落照昏一聲漁唱與招魂
紉蘭餐菊生平事

沙冷月寒何處村

醉餘看字眼麻茶佳句拈來似隔紗讀去讀來元有味
南湖從此說梅花

老去哦詩懶解工筆端隨分有春風傍人若問梅花句
盡在西湖風雪中

次韻常之用前人韻賦梅花十絕

老來為圃萬緣輕一見梅花眼倍明所恨平生無句眼
其如相與有詩情

淵明豈獨愛東籬便愛東籬亦匪私耐雪耐霜同臭味
佳花尤愛夾花枝

風靜得香多醞藉雪殘觀色轉精神不教翠竹踈松畔
清殺天寒日暮人

拙速誠難語巧遲誰知先進野人為絕憐飯顆山頭老
江路聞香有喜詞

每愛孤山靜思凝歲寒不脫栢青青暗中參得橫斜趣
不費陶潛影答形

玉川清苦更清狂一夜相思不可當
解道是君看亦好不然白地斷人腸

未點蒼苔已點衣
遽辭脩竹翠相依
若教笛怨歌催盡
寧受風吹雨打稀

浮玉飄香別緒多
緩流溪水浸銅柯
先春有意春無意
春奈千紅百紫何

臘雪溶溶斷送冬
明朝波面受春風
北園幾樹紅苞坼
只合吹將酒盞中

桃縱天天杏縱繁
哀翁其奈眼尤寒
自知不是尋芳伴
且把寒枝子細看

次韻古梅二首

予近得鄉中甌浦梅坡皆老梅

綠苔枝上玉踈踈
折贈詩人意不孤
惱殺渠儂歸未得
梅坡千樹有如無

玉鑑堂前迹已踈
殘香應伴鶴聲孤
郎潛桂隱身藏却
新為梅花著句無

直舍紫薇花身可以題字
因作一絕書其上

赤立嚴霜如槁木爛開炎日似紅霞耐寒耐暑真能事
豈是人間怕癢花

揚州席上次蔣右衛韻賦白牡丹二絕

秋思憑高不易裁陽和喚得故人來自憐梅萼成孤絕
借與春風一色開

玉甃銀鉶千尺清喚回玉色謫仙人沉香亭畔無消息
付與揚州十月春

按此首原本誤作落墨牡丹詩停車
京洛一首誤作白牡丹詩今改正

北方館駙屏風皆畫落墨牡丹

停車京洛淨風沙
幾見屏開落墨花
故國似人猶可喜
穠肌何況謝鉛華

池荷

高高碧蓋擁紅衣
拍拍方塘漾渺瀰
前竹後松相映帶
香風何自透禪扉

次韻方叔媚川圖亭上觀芙蓉

節霞擘錦炫晴空
碧玉芙蓉晚更紅
只道商秋為素景
也教春色艷秋風

顯庵許轉覓紅蕉未至絕句奉簡

過眼浮華擲錦梭
聞閒習氣種花窠
蕉中得鹿元烏有
雪裏看蕉竟若何

從潘濟叔覓花栽得紅蕉鳳仙大蓼謂水梔僅
有一窠寒窗不可無戲作二絕

幽人憐我學鋤耰
寄與花栽一一收
莫道芭蕉失寒暑
鳳仙宜夏蓼宜秋

聞說君家有水梔
虬枝怪石眼前稀
何如借與銷長夏

待得寒窗却送歸

和索同年接伴賡從客陸成父玉簪花韻

玉長藍田潔更芳
盞簪如待紫陽裝
仙人尚欠頭冠在
好種黃葵阿那傍

次韻木伯初秋蘭

堪嗟堪惜是懷沙
占得秋蘭作楚花
世莫我知方自足
底將逝水送韶華

芳潔清幽隱操中
蘭兮消得小山叢
略無醞藉惟岩桂

滿院秋香一樹風

萬蘂千葩角富豪
秋蘭無處却為高
蚤知捷徑終南是
招隱當時不入騷

月桂

案月桂應
作月紅

春來花事各名家
肯許常春擅物華
雪裏香紅更清絕
只應名作歲寒花

相臺得菊本名之曰繡菊

非紅非紫矇茸茸
依舊黃流美在中
漢使攜將名繡菊

要同丹桂種蟾宮

次才伯初蠟梅三絕

格韻評量故是梅採薪叢裏凍花開蜂衙不逐飄零盡
真似天工蠟綴來

蜂薰脾蜜麝薰臍香染薔薇色染梔大似幽蘭懷隱操
有心聞處得香遲

氣稟中央色自莊丹心展盡只輸香自知不結和羹實
合作山家澹泊裝

六言詩

成德堂

帝謨亦言九德父教等謂三成茲堂不媿扁榜公家有
賢弟兄

思賢堂

取善乃與為善見賢合思齊賢公平何若愛士富者惟
欲求田

題北山軒詩

鵬鷁逍遙各適猿鶴驚怨何知有瓜得東陵種無文煩
北山移

用山谷韻題洪子恂所藏山谷六言詩

逢原妙處何如水到自然成渠信手拈來都是彈圓頌
印泥書

次韻周畏知用南軒聞說城東梅十里句為韻
六言七首

湘西山亦既見城東梅所未聞急湏盍簪共賞可惜委

地餘芬

廣平心腸鐵石姑射肌膚冰雪共令索笑求詩未免嬰
情駕說

故人馳一枝使詩翁築五言城須邀從事入幕休喚孔
方作兄

夢蝶驅除枕上驚鴻約略墻東石裂崑崙前積雪角咽城
頭曉風

意了無東閣興句不到西湖梅非公安得聞此欲往何


其快哉

松逕晴泥欲乾
茅簷宿雪猶濕
滿枝空懷杜二
夜誦誰德計十

行歌已聞落梅
寡和猶傳下里
好步故難卒行
迅雷那及掩耳

周畏知遺二毫
筆雖舊猶耐書
戲作六言奉簡
我愧不能扛鼎
君安得此如椽
拔羊毛以利較
夔蛟足相憐

不肯羊質欺世寧作兔園隱居令尹雖舊令尹中書今
尚中書



欽定四庫全書

卷十八